



ՀԱՅԱՍՏԱՆԻ ՊԵՏԱԿԱՆ
ՏՆՏԵՍԱԳԻՏԱԿԱՆ
ՀԱՄԱԼՍԱՐՆԱ

ՄԱՍՆԱԳԻՏԱՑՈՒՄ • ՓՈՐՁ • ԴՆԱՐԱՎՈՐՈՒԹՅՈՒՆ

ՀՊՏՀ ռեկտոր, պրոֆեսոր Կորյուն Աթոյանի խոսքը «Մարտական հաշվարկ» գրքի շնորհանդեսին

Հարգելի հյուրեր, գործընկերներ, սիրելի ուսանողներ

Այսօր մեզ համար, հիրավի, հիշարժան և կարևոր օր է: Մենք հավաքվել ենք ոչ թե տոնելու սուկ գրքի շնորհանդես, այլ ևս մեկ անգամ հայացք ձգելու մեր ոչ հեռու անցյալի հերոսական էջերին, հարգանքի տուրք մատուցելու քաջարի հայորդիներին:

Արցախյան ազատագրական պայքարը ազգային ինքնագիտակցության զարթոնքի մի նոր էջ գրեց մեր պատմության մեջ: Այդ օրերին հայրենիքի հանդեպ սերը, անձնագոհության պատրաստակամությունը մի նոր ուժգնությամբ էր բաբախում մեր սրտերում, մենք միակամ էինք ու պատրաստ անձնվիրության. հասունացել ու բռունցքվել էր պայքարի ոգին:

21-րդ դարի նախաշեմին կերտվեց հայոց նորօրյա հաղթանակը, կերտվեց մաքառումների ու արյան գնով ու ծնեց հերոսներ: Հերոսներ, որոնք մեր ժամանակակիցներն են, մեր եղբայրները, հայրերը, ընկերները և հերոսներ, որոնք ավարտեցին իրենց կենսագրությունը և դարձան անմահության ճամփորդներ: Նրանք հեռացան՝ թողնելով հայրենիքը իրապես սիրելու, նրա նվիրյալ զինվորն ու ծառան լինելու պատգամ:

Այդ օրերին հայրենյաց զինվորներ դարձան ամեաագնիվ, ամենավեհ ու ամենախիզախ հայորդիները՝ ահել, թե ջահել, ուսանող, թե ծառայող, բանվոր, թե պաշտոնյա: Նրանք բոլորը հավասար էին այն մեծ գաղափարի առջև, որը կոչվում է հայրենիքի փրկություն:

Քսան և ավելի տարի է անցել այդ օրերից, պատերազմի վերքերը դանդաղ են սպիանում: Կյանքը հայրենիքին նվիրաբերած զինվորների անունները ոչ միայն չեն խամրում, այլև որպես լուսե հիշատակ ուղեկցում են մեզ ու հաստատում, որ նախնյաց քաջորդիների ոգին ապրում է մեր զավակների մեջ և, Աստված մի արասցե, եթե անհրաժեշտություն լինի, ապա առաջ կգան նորօրյա հերոսներ:

Արցախյան ազատամարտի անվեհեր ազատամարտիկներին անուն առ անուն հիշելը, նրանց սխրանքները հիշատակելը մեր բոլորիս

պարտքն է, քանզի նրանց պայքարով թեժ մարտերում թրծվեց հաղթանակը ու կայացավ Հայոց ազգային բանակը:

Այդ պայքարում իրենց ավանդը բերած շատ կամավորականների անուններ կապված են Հայաստանի պետական տնտեսագիտական համալսարանի հետ: Նրանց շարքերում մեր բուհի դասախոսներ էին, շրջանավարտներ, ուսանողներ: Վերջիններիս մասին, որոնք տակավին ուսանող դարձած կամ երկրորդ, երրորդ, չորրորդ կուրսում մեկնել են ռազմաճակատ, բավական ծավալուն վավերագրում կա համալսարանական պարբերականներում: Այդ նյութերը մեր ազատամարտիկ ուսանողների մարտական կենսագրության արձանագրումն են, հարազատներին ուղղված նամակների հրապարակումներ, ծնողների, ուսուցիչների, դասախոսների, դասընկերների ու մարտական ընկերների հիշողություններ: «Հայոց ուխտի զինվորները» վերտառությամբ նրանց լուսանկարները տեղադրված են համալսարանի թանգարանում, բուհում գործում են լսարաններ՝ անվանակոչված ի հիշատակ նրանց, հաղթանակի, անկախության ու բանակաշինության ամեն տոնի համալսարանի ղեկավարությունն ու ուսանողությունը կրկին ու կրկին ոգեկոչում են նրանց հիշատակն ու գործը:

Այսօր կրթվում, դաստիարակվում ու հասակ է առնում տղաների մի նոր սերունդ, որը հրաշալի ճանաչում է այսօրվա մեր անկախ ու հպարտ երկրի համար իրենց կյանքը նվիրաբերած քաջերին: Ոչ միայն ճանաչում է, այլ նախանձախնդիր է, որ նրանք իրենց կայուն ու հավերժական տեղն ունենան նախնյաց ու ապագայի հերոսների շարքում, և այս գիրքը դրա վկայությունն է:

Ամեն անգամ, երբ շնորհակալական նամակներ են ստանում Հայաստանի Հանրապետության պաշտպանության նախարարության գորամասերի հրամանատարներից, որոնք զինվորական ծառայություն անցնող մեր ուսանողների մասին դրվատանքի խոսքեր են մեզ հասցեագրում, հպարտությամբ են համակվում և հուսավածվում, որ հերոսների ոգին ապրում է, ու պայծառ է Հայաստան երկրի ապագան:

Դրվատանքի է արժանի ուսանողական խորհրդի այս նախաձեռնությունը: «Մարտական հաշվարկ» գիրքը մեկտեղել է մեր բուհի այդ ուսանողների հերոսական պատմությունները՝ այդպիսով դառնալով արժեքավոր հրատարակություն: Շնորհավորում են բոլորիս և հատկապես գրքի հեղինակ Հայկ Բեջանյանին:

Հատուկ ցանկանում եմ իմ երախտագիտության խոսքն ուղղել մեր համալսարանի ազատամարտիկների հարազատներին, ընտանիքներին, բարեկամներին: Հայրենիքն ուժեղ է իր արժանավոր զավակներով և փառք Ձեզ՝ նման զավակներ դաստիարակելու համար: Մաղթում եմ Ձեզ տոկունություն, առողջություն. ընդունեք մեր խորը հարգանքն ու խոնարհումը Ձեր առաջ, Ձեր որդիների բարձր հիշատակի առաջ:

Հարգանքով՝
ՀՊՏՀ ռեկտոր, պրոֆեսոր
Կորյուն Աթոյան